



## QUÆSTIO MEDICA,

Quodlibetariis disputationibus manè discutienda in Scholis  
Medicorum, die Lunæ 10 Februarii 1721.

M. JACOBO TRANT,  
Doctore Medico, Præside.

*An functionum æquabilitas à circuitu sanguinis inæquali?*

## I.

FUNCTIONIS nomine vetustissimi Scriptores operam atque admī-  
nistrationem intelligi voluerunt. A Medicis in aliam sententiam accipi-  
tur, ad quorum mentem definiri potest, actio quædam in nobis dependen-  
ter à naturali partium dispositione elicitæ. *Εὐεργεια* Græci vocant; estque  
ejusmodi, quæ & partis, unde pender, præsentem denuntiet sanitatem, &  
futuram quodammodo spondeat. Sic exhalatio uberior, pervia cutis spiracula,  
meabilesque pro naturæ instituto poros esse declarat, & impendentis  
cutaneis ductibus cujusvis morbi metum amolitur. Sic urinæ facilis & expe-  
dita per renum canaliculos in vesicam à sanguine derivatio apertè indicat,  
renum sibi constare secundam valetudinem; adversam, à causis præsertim  
internis, vix unquam imminere. Functiones sat commodè partiaris in ani-  
males, naturales, & mixtas; seu mavis, in publicas & privatas, quarum  
omnium æquabilitas in actionum constantiâ, & non perturbato statu modo-  
que consistit. Functiones aut secretionibus continentur, aut à secretionibus  
pendent, aut aliis absolvuntur motibus, quos in corpore humano passim  
fieri deprehendas. Variari functiones, pro secretionum motuumque exte-  
riorum varietate quis negaverit?

## II.

SECRETIO, nunc pro secretionis opere sumitur; nunc, pro secretio-  
nis operatione usurpatur, estque certi cujusdam liquidi à sanguine segre-  
gatio, tum à cordis impulsu, tum ab humorum segregandorum indole,  
tum à ductuum segregantium proportionem proficiscens. Fieri plurimas in  
homine secretiones, si minus rationis; at certè cultri anatomici fides, &  
observationum argumenta persuadent. Nam quò spectat tantus tot visce-  
rum apparatus? Quò glandularum nusquam ferè non occurrentium supellex  
operosior? Quò pororum à trita sanguinis viâ divertentium flexiones &  
Mæandri? An non videntur hæc ab opifice Deo tam singulari operâ artifi-

cloque perfecta, ut multiplicandis in immensum secretionibus allaborent? Certè rem ipsam vel leviter expendenti planè videbitur nullum esse locum in nobis, secretionis organo vacuum; cùm nullus omninò reperiatur secretionis rore destitutus. Hinc corporis humani regiones à se invicem vel maximè diffinitæ non modò partium continuatione, sed communis etiam officii societate conjunguntur. Quemadmodùm autem patet, fieri secretiones in universo corpore quamplurimas; ita constat, fluida specie quàm maximè diversa, in variis corporis partibus organisque secerni. Bilis enim, in hepate; mucus intestinalis, in intestinis; utina, in renibus, aliique percolandi humores, in suis quisque incuniculis percolatur. Sine his vitam aut omninò non esse, aut certè non esse vitalem existima. Cave tamen hinc inferas, secretionum inter se discrepantiam esse secernentium organorum multitudini parem. Ex his secretionum, sicut & aliorum complurium motuum discriminibus, functionum æquabilitas & tenor existit.

## III.

**S**ANGUINEM jure dixeris esse fontem, undè salus & vita plene fluunt alveo, & in reconditissima corporis loca derivantur. Triplex in sanguine motus. Alius enim est liquidi, in eo positus, ut particule sanguinis permixtæ cujusdam materiæ subtilioris ope nonnihil ab invicem sejungantur, & à mutuis arceantur amplexibus, quò faciliùs materiæ quaquaversum impellentis imperio obsecundent. Alius intestinalis, sive vorticofus, à liquorum tam inter se, quàm cum parietibus vasorum conflictu profectus, quo minima sanguinem constituentia gyros agunt, circa centrum suum moventur & incalescunt. Alius denique circuitus dicitur; sitque cùm sanguis à cordis carceribus ad membrorum omnium usque, viscerumque metas excurrit, & rursus ad cor irrequieto pede recurrit. Motus hic ducit à corde principium. Ab arteriis non perinde juvatur, atque læditur & retardatur. Undè sanguis, quò longius à corde progreditur, eò movetur lentius, minusque accenditur; tum propter impensam motus sui partem in flexiles vasorum parietes, tum propter amplificatas aut contortas distortasve canalium diametros, tum denique propter imminutam impulsione cordis, fortius in vicinum, debilius in remotius fluidum agentis. Hinc colliges in variis à corde distantis, varium esse circuitionis motum & caloris; cùm hic ita sequatur illum, ut pro illius citatiori tardiorive gradu, intensior hic aut remissior evadat. Quid quòd varia multumque diversa sanguinis est in variis organis visceribusque progressio. Ex hac progressionis inæqualitate musculorum motus, secretionumque varietas & concors discordia nascitur.

## IV.

**I**N evolvendis secretionum causis quot hætenus Medici posuerunt operam, totidem ferè hæc de re circumferuntur opiniones, quarum hæc dextrorsum, illa sinistrorsum abit; alia vagatur aliàs, & licenter errat. Est enim, quæ naturæ simplicitati repugnet. Est, quæ ab artificio structuræque partium abhorreat; est denique, quæ non magis secum ipsa consentiat, quàm à cæteris discrepat atque dissentit. Ex omnibus autem vix reperias unam, quæ veri speciem præ se ferat, quamque ex omni parte possis beatam appellare. Nam, ut missas faciamus explosas illas jampridem, & ex

animis hominum propemodum obliteratas Veterum facultates, an non lepidè contextam de fermento, secretionum (si Diis placet) opifice, fabulam sibi parum constare manifestum est? Ubinam enim hoc fermentum percolari conjiciemus? Cujus alterius ope fermenti à sanguine secedere? Quà deinde vià ad glandulas tubosque secretorios, integrè virtute, pervadere? Quà vi hæere in glandularum cavis? Quamobrem denique ab impacto sanguine non exurbari continuo, aliòque transferri? His, credo, rationibus permotus non-nemo in locum fermenti sufficit spiritus ipsos animales, à quibus varii generis fluida solvi, separari, & in suos quæque ductus porosque dirigi pro suo jure pronunciavit. Quà quidem in re vir, cæteroque doctus, videtur strenuè nugari. Nec minùs hallucinantur, qui secretionum differentiam arcessunt à glandularum orificiis, quibus dissimiles admodum figuras affingunt. Nam præterquam quòd reperias in corpore humano cola, quæ glandulis annumerari vetat anatomicorum observatio; illud certissimum est, hujusmodi figurarum dissimilitudinem ad humorum trajectionem vix quidquam facere, nec omninò cum liquorum proprietate stare posse atque congruere. Liquores enim continentium tuborum latera premunt æqualiter; eorumque, si flexilia sint, perpendiculares ad axem sectiones, circulares reddant, necessum est. Nec satisfaciunt, qui secretionis animalis obscuritatem ductis à chartà bibulà exemplis illustrare conantur. A naturæ scopo propius absunt, qui meatibus, ut rotunditate similibus, sic magnitudine variis, secretionis opus inchoandum absolvendumque committunt. Veruntamen rem non expediunt. Nam etsi ipsis ultrò concedimus lympham, ut potè laxissimà compage laticem, ad secessionem ubivis esse paratissimam; nec, ut secedat, aliud quidquam præter poros ad id accommodatos requirere; nihilominùs alia est longèque dispar cæterorum humorum secernendorum ratio. Cùm enim consilari debeant ex particulis imperfectiorum contactu coherentibus, & se invicem faciliùs, difficiliùsque; strictiùs laxiùsve pro varià, quàm sortiuntur, indole prehendentibus; cùmque hujusmodi cohesio particularum eò magis interturbetur, quò minùs æqualiter moveretur circumfusus liquor; consequens est, ut fluida secretioni destinata in majoribus & cordi propioribus arteriis coagmentari non possint; in minoribus & à corde remotioribus possint. Varii proinde humores diversas à corde distantias, sive diversas in sanguine velocitates, ut generentur, utque secernantur, exigunt.

## V.

**N**ON solum autem depromptorum & sanguinis penu fluidorum, sed ipsius etiam chyli secretio sanguinis inæquali motu & velocitate nititur. Hic enim liquor ut in vitæ pabulum facessat, aperti sint ductuum lacteorum, quos subeat, hiatus & oscula, necessum est. Hæc multiplicatis vasculorum intestina rigantium quasi reticulis ambiuntur, involvuntur & ferè coarctantur. Strangularentur omninò, si quo pede fertur sanguis cordi proximis, si quo impetu partium aliarum vasa distendendo permeat, eodem in perreptantibus intestina vasculis raperetur. Absit metus. Non hic, ut alibi, saliendo ruit, sed placidiori repit allapsu. Mesentericæ utriusque arteriæ rami divisi multifariam, & mirum in modum dispersiti, multipli-

catorum inter se communione surculorum arcuumque junguntur. Hinc interiformes plexus minores minimosque abeunt, & sibi invicem, nusquam interrupto confluentium alveolorum congressu, intertexuntur. Tandem ex ultimis canaliculorum plexibus in flexuoso mesenterii limbo focia divaricantur arteria, tenerrimo vasculorum reticulo tractum omnem intestinorum amplexura. En multiplicatas in immensum ferè corrivationes, à duabus duntaxat arteriis, iisque haud ita magnis profectas. Quid autem sibi vult hic mechanismus, nisi ut irruentis per truncos mesentericos sanguinis impetus ampliatis alveis infringatur, cruorque decurrendis tot vastissimi campi mæandris quasi defatigatus, in exigua intestinorum vascula lentius & lenius irrepat. Hoc artificio itus reditusque oscillantium fibrarum suum servant tenorem, & appellenti chylo lacteorum ductuum oscula referantur. Haud absimilem vasorum apparatus in musculis animadvertas. Horum tum fasces, tum fasciculos oculis microscopio præmunitis si contemplare, subtilissimo vasculorum reticulo arteriis venulisque quasi cingulo præcingi videbis. Hæc toridem impulsu cruoris sufflamina, corrugandis musculorum villis, & expellendæ lymphæ quàm aptissima.

*Ergo functionum æqualitas à circuitu sanguinis inequali.*

Domini Doctores disputaturi.

M. Jacobus Trant, A.A.S.  
Moderator.

M. Guillelmus de Magny.

M. Amanandus Dost, Facultatis Decanus, Regi à Sanctoribus Consiliis, & Serenissima Ducissa Biturigum, dum viveret, Medicus Primarius.

M. Petrus Maloet, Regis Consiliarius & Medicus, nec non Domus Regie Invalidorum Militum ordinarius.

M. Gabriel-Antoine Jacques.

M. Franciscus Gouel.

M. Ludovicus-Simon Emmeret.

M. Claudius de la Vigne de Frecheville.

M. Joannes-Baptista Doye, antiquus Facultatis Decanus.

Proponebat Parisiis NICOLAUS LE ROY, Rothomagensis,  
Baccalaureus Medicus, A. R. S. H. 1721,  
à sextâ ad meridiem.

---

Typis J. QUILLAU, Universitatis & Facultatis Medicinæ  
Typographi